

EPESO YACNOCQUIDON ISTE

1 ¹Pabado nebi. Nuquin Papa bunacpadomboen Esuquidistun, Ēbi chui beneta, caid nebi. Adquidquio icquin mibitedi Nuquin Papan bēdamboquid icmenu caidombo icsho chuiquin dada uaimbique. Epeso yacnocquido mibitedi Esuquidistu tantiaquidombo yec isec onquecuededta.

²Aden Nuquin Papan bēdamboquid icmenu caidombo icquin ma Nuquin Papan Nuquin Icbo Esuquidistubēdtan ēnenquiocquin ēbi bēdamboen isec, quequin mibitedishun tantiapashun. Adembidi, Nuquin Papan bēdambo icmenu caido yec abēd iquebi, quequin tantiapashun mibitedishun.

Nuquin Papan abēd abuc bēdamboec tabadacpadquiocnoc icmiaid

³Edoen, Nuquin Papa, Nuquin Icbo Esuquidistun Papa bēdamboquid nec. Esuquidistu adquidquiobidi neoaic. Aid tantiaquid icsho abēd abuc bēdamboec tabadacpadquidquio nuquitedi icmiac. Adoaid yec, Mibi bēdamboquid nec, Papa, quequin chiec nuquitedi onquedenec. ⁴Nidaid abubēdta uabicquin aidēnquicquidtedi uabicquin, Nēdtedquio Esuquidistu tantiaquido icsho ēmbi cuēmbanaido iquendac, quequin Nuquin Papan tantiapampic. Ambi tantiampicpaden ma nuqui icsaisa icmepanuna. Aden nuqui tantiaquin ⁵abi bunacpadomboen

Nuquin Papan, Esuquidistu tantiaquido con bacuēbo icmendambi, quiampicpadomboen nēbi adobanec.

⁶Esuquidistu tantiaquid nuqui icsho abēd icquid nuqui icmenuen Nuquin Papan abi yacpadquidquio icmebanec. Adoac, Bēdamboquid mibi nec, Papa, quequin Nuquin Papa nuqui chuidenec.

⁷Matsestedi icsaid bedshunacsho Nuquin Papa cudasaidquio Esuquidistu icsambocquidbimboecnuc cuesten dectanquin unēs uapanēdash. Adosho isash, Nēbi Esuquidistu tantiaquid ēmbi bēdamboen isaidquio nec. Mibi cuidenquio yec mibi icsaid bēpiscudobi, quec Nuquin Papa. ⁸Naden nanuna, quequin ambi tantiampicpadomboen aton bacuē icmebanac abēd icquido nuqui nec. ⁹Abi bunacpadomboen, Icsaquid cuidte bedshunash unēsquid con Mado Esuquidistu iquendac, quequin ambi matses tantiamenquio icpampid nēbi ambi cuēmbanaido Nuquin Papan tantiamebanec. ¹⁰Adoaid iquec con mado abun icquido nidaid yacnocquidobēd chuiquid abentsēqui iquendac, quequin Nuquin Papan tantiampicpadquiobi adquidquio icmenu caidquio Esuquidistu iquendac.

¹¹Esuquidistu tantiaquid icsho isun ambi tantiampicpadomboen, Con bacuē icmiaido nec, quequin Nuquin Papan cuēmbanaido ¹²abia tantiaquido nuqui bēdamboec tabadsho isash, Nuquin Papa bēdambo iquec, quequin chiec ma

utsibo cuëdëmpanuna. ¹³Mibi icsaid bedshunash abided cuidadec Esuquidistu unësphanëdash, quequin chuibanac abi tantiaquido mibitedi yansho isun, Esuquidistun na nec, quequin aton Mayan mibi meniaid abi iquec. ¹⁴Aidëmbi mibi bëdambo icmiac Nuquin Papabëd tabadendac. Mibitedi bëdamboec tabadsho isash Nuquin Papa bëdambo iquec, quequin chiec ma utsibo cuëdëmpanuna.

Nuquin Papa chiec onquianiaid

¹⁵¿Bëdamboecta Epeso yacnocquido Esuquidistu tantiaquido tabadpec? quec tantiec tsadquimbi, Esuquidistu tantiec Epeso yacnocquid dadpen yanosh, quequin utsibon chuisho tantiombi. Adembidi, Epeso yacnocquido Esuquidistu tantiaquid yanash abipadquid utsibo tantiec abëd icte bunanec iccuededec, quequin chuisho tantiapombi. ¹⁶Aden tantiashun mibitedi bëpiscudenquiocquin badiadquidën-badiadquidënquien naden Nuquin Papa chian-chianembi. ¹⁷Esuquidistun Papa, icsaisambo, tantiaquidquio mibi cadoque. Mibi bëdamboen tantiaquid yacpadquiocnoc min bacuëbo Epeso yacnocquido min mayan icmeban, Papa. Adquido min Mayanën icmiac mibi tantiadonequidombo ma icpanuna. ¹⁸Adecbidi, Abuc ëbëdi mibi iquendac, quequin mimbi chiacpaden tantiamequin pausunac mibëd icnuequin cainquidombo Epeso yacnocquido ma icpanuna, Papa. Aidën tantiamiac, Mibi yacno Esuquidistu tantiaquid utsibobëd bëdamboec tabadendabi, quequin Epeso yacnocquidon ma tantiapanuna, Papa. ¹⁹Aden tantiamiac Nuquin Papan nadatiambocquin nabanquin Esus unësacsho uincuemënëdacpaden ëbi

uincuemendac. Adembidi nadatiambocquin nabanquin Esus tantiaquid ëbi icmiac. Adembidi ëbi bëdambocquid icmebanec, quequin ma Epeso yacnocquidon tantiaquiopanuna, Papa. ²⁰Esuquidistu unës uacsho uincuemeshun mibi yacno aidi indoshon min dayunquio mimbi tsadumpanëdac, quequin tantiec Nuquin Papan nadatiambocquin naidquio nec, quequin adomboembidi ëbi indoapec, quequin tantiacpadomboen ma Epeso yacnocquidon tantiapanuna, Papa. ²¹Nadatiambocquin nabanquin Esuquidistu abuc buanshun abitedi chuiquid dapa aidi mimbi icmioc. Mibipadquid utsi nibëdec, quequin Esuquidistu min dayunquio tsadunquin utsibo mimbi ismepanëdac, Adquid nebi, chuiquid utsi quetiapimbocnoc. Nuquin Papan nadatiambocquin nac ënenquiocquin abitedi chuiquidquio Esuquidistu iquendac, quequin Epeso yacnocquidon ma tantiaquiopanuna. ²²Abitedishun con icbo caidquio Esuquidistu nec. Abi tantiaquidtedi aton shubun icquido nec. Aidon con icbo quequin chuidoniaidquio nec. ²³Ambi ëndenquimbo tantiampidtedi abi tantiaquido yanash aton shubun icquidombo nuqui iquendac. Nuqui Chuiquid Abentsëcquiobi Esuquidistu icquin abëd icquido nua pausunaido yec abi yacpadquio ictequid yec abentsëc yac bimboec abëdi nuqui tabadendac.

Nuquin Papan Esuquidistubëd icmiaido

2 ¹Mibi icsaquid yec Nuquin Papabëd ictiapimbo iccondac. Adboedi nëbi aidëmbi ënenquiocquin abëd icquido mibitedi icmiac. ²Ënden Nuquin Papa chieshënquin mimbi tantiacpadomboen nabanondac. Adquid icsho Nuquin Papa chieshënquid dapan Satanasën yuaido mibi iccondac. Aidën Nuquin Papan

chiaid niacacpadomboen mibitedishun niacbededpondac. ³Adquiduidquo yec nuqui tantiacpadec icsadenec nuqui tabadpadenec. Adec tabadquin Nuquin Papan chiaid niactenepondac nuqui. Aden niacsho isun adquid utsibobëdta Nuquin Papan cuidnu caido nuquitedi icpondac. ⁴Adec cuidnu queboedëmbi nuqui tantiec unësquiocquin Nuquin Papan comapenen nuquitedi tantiamepondash. ⁵Ambi cuidnu caido icsaquido yec abëd ictiapimbo nuqui tabadpondac. Adec tabadsho Esuquidistu tantiaquido nuqui icmebanquin abëd icquido Nuquin Papan nuquitedi icmiac. ⁶Esuquidistu nuqui icsaid bedshunacsho abided cuidquin unës uapanëdash. Unësacsho isun uincuemeshun abi yacno Nuquin Papan indopanëdash. Adshun abi tantiaquidtedi abuc Esuquidistubëdta ambi indoac bimboecquido icsho Nuquin Papan nuqui bëdamboen isec. Adecbidi abuc Esuquidistubëd icquid nendabi, quequin tantiec nuqui tabadec. ⁷Nuqui icsaquido icsho Nuquin Papan Esuquidistu tantiaquid nuqui icmeshun, Cuidnu, quenquiocquin Esuquidistubëd icquido nuqui icmec. Ma adquid icsho isash utsibo, Nuquin Papan naid nec, ma quepanuna. ⁸Nuquin Papan, Cuidnu, quenquiocquin Esuquidistu nuqui tantiamiac abi tantiaquidombo nuqui yanondac, Ëmbibi tantiemi, quetiapimbo nuqui icnubi, Mibi tantiamiombique. Ëbi cuidquin mene, quenquiocquin Nuquin Papan nuqui tantiamiosh. Adoac Esuquidistu tantiaquid yec abëd icquido nuqui nec. ⁹Icsaquido icquin bëdamboen naic nuqui icsaid cuidadtiapimbo nuqui iquec. Bëdamboen naic cuidadpebi, quiaish abi icsaquid yequi, Bëdambocquid nebi, quec tabadsho isun utsibon icsamboen tantianushe queshun

Nuquin Papan icsaisa aton Madoded cuidpanëdash. ¹⁰Nuquin Papan uaido nuqui nec. Aidëmbi Esuquidistu tantiaquido nuqui icmebanec ma ambi tantiampicpadomboen utsibotsen nuqui tantiaquin ma nashumpanueshun.

Esuquidistubëd abentsëc yacbimboecquido

¹¹Nuquin Papan, Cuidnu, quenquiocquin comapenen tantiamiaidquo mibitedi icquin mibi ënden tabadaid tantiata. Shui dëbid dëtemesa isadaidpembo nec, quequin isadaidbon shui dëbid dëtemequidon mibi cuënondash. Nuquin Papan masesquio nebi, quequin shui dëbid dëtemequidquo isadaidbo nec. ¹²Adquidquo isadaidbo icnuc, Nuquin Papan chomiaid choec, quequin tantiesa mibitedi icpondac. Adquido yec Nuquin Papan mases nebi, isadaidbo quiacpadec adtiapimbo mibitedi iccondac. Adecbidi, Ëbi yacno yuedanquid iquendac, quequin Nuquin Papan chiaid tantiesa mibitedi icpondac. Adecbidi, Abëdi ënëdenquo yec tabadebi, quequin chuitiapimbo mibitedi icoapondac. Adecbidi, Abia yampid Nuquin Papambo iquec, quequin tantiesa mibitedi icpondac. ¹³Adec aid tantiesa yec icsaquid yec, Nuquin Papa yacno puduednu, quetiapimbocboedi, Matses icsaid bedshunash abided cuidadec Esuquidistu unëspanëdash, quequin tantiaquid icsho aidënquo abi yacno yuedendac. Nëbi aid tantiaquid yec abi tantiaquid utsibobëd abëdi tabadac bimboecsho Nuquin Papan nuqui bëdamboen isec.

¹⁴Isadaidpembo isash isadaidbo, Ëbëd icquidpenquo nec, quequin tantiec datamëcuenepondash. Adecbidi isadaidbo isash adquiecbidi

isadaidpembo datamëncuenepondash. Adquido icboedi ëbi icsaid bedshunash Esuquidistu unëspanëdash, quequin isadaidbo utsin-utsinquien tantiec. Adembidi isadaidpembo utsin-utsinquien aid tantiec. Adec aid tantiaquid yanash datamëncuenenquio yec matses abentsëc yac bimboecquido yanac. ¹⁵Esuquidistu matsesash nidaidën tabadquin isadaidbo icquin isadaidbon, Naden nata, quequin chiapadomboen utsitedishun natiapimbocnobi Esuquidistun uesquin nabampanëdash icsainquiocquin. Adec tabadquin naimbudsho icsaquid bimboecnuc unë uapanëdash. Aden unësmesho isec Nuquin Papa, Padi. Chën, quenquio icpanëdash. Ëbi yacno isadaidbo isadaidpembobëdtabi con madon yuedendac, quia sh chën quenquio icpanëdash. Datamëncueneboedi aido Esuquidistu tantiaquid yanash datamënenquio yanac. ¹⁶Naden nata, quequin chiaidtedi nuqui natiapimbocnoc nuqui icsaid bedshunash Esuquidistu unëspanëdash, quequin tantiaquido isadaidbobëdi isadaidpembo yanac. Ambi tantiaid Esuquidistu yanash datamëncueneboedi adec datamënu quetiapimbo yanec Esuquidistun shubun icquido yanoaic. ¹⁷Matsestedi bëdamboen iste Nuquin Papa bunec quequin ambi chuibeniacpadec abided matses icsaid bedshunash unësqin isadaidbo isadaidpembobëdta Nuquin Papan bëdamboen isaido icmepanëdash. ¹⁸Adoac nëid isadaidbo nec. Nëidic isadaidpembo nec, quenquiocquin, Esuquidistu tantiaquid nec, quequin Nuquin Papan abi tantiamenuequid aton Mayan meniac. Aden meniac aidën tantiamiac, Mimbi ëbi tantiec, quec Nuquin Papa chiec Esuquidistu tantiaquidombo onquedenec.

¹⁹Aden chiec onquec ambi yuedtiapimbo icboedi nëbi Esuquidistu tantiaquido yanash Nuquin Papan shubun ënden icnëdaidobëd tabadtequid mibitedi iquec. ²⁰Adquid icsho aton Mayan meniac Nuquin Papa tabadte Esuquidistu tantiaquido nec. Abi tabadte nadquio isadeque. Chuinu. Tania. Esuquidistu abia yampid abi yacno yuedanquidquio yec abia nitsinaid cuate nidquidbimboecquid nec. Nuquin Papan chiaid chuibampapidobëd Esuquidistun ëbi chuibeneta caido shubu nitsinaid bimboecquid neoaic. ²¹Aided abia icquid icnuc isadaidbobëd isadaidpembo Esuquidistu tantiaquid dadpen yansho Icbon tabëcshun tanebanaid bimboecquido neoaic. Abi tabadte Icbopadquid icsaisa yampec. ²²Mibi Epeso yacnocquido Esuquidistu tantiaquid utsibobëd Nuquin Papan Mayan meniaid yec Nuquin Papa tabadtebidi mibi nendac.

Isadaidpembo Esuquidistu chuibenequid Pabado

3 ¹Isadaidpembobëdi ma Nuquin Papa tabadte icnu quequin Esuquidistu chuibenesho quënën naueidaid icquin aidën chiapadomboen mibi chuibanquidquio nebi. ²Isadaidpembo yacno nidshun Esuquidistu chuibeneta Nuquin Papan cac nebi. Esuquidistu chuibenequid Pabado nec, quequin mimbi tantiec. ³Ëbi yacno yuedanquid Esuquidistu iquec, quequin Nuquin Papan tantiamiacpaden ënden dada uaquin mibi chiondambi. ⁴Ëmbi dada uaondaid bëdamboen isec onquequin Nuquin Papan ëbia Esuquidistu tantiamiacpaden mimbi tantiapec. ⁵Ëndenquio Nuquin Papan Esuquidistu nidmimbi, quequin

chienquiocpampidëmbi nëbi ambi,
 Esuquidistu matses tantiameta, caid
 aton Mayan nec. Adoac Nuquin Papan,
 Esuquidistu chuiheneta, caidtedi ambi
 naden nanuna, quequin
 chienquiocpampidëmbi aton Mayanën
 tantiamiac. ⁶Ambi nëbi tantiamiaid nad
 iqueque. Tantia. Chuinu. Isadaidpembo
 Esuquidistu tantiaquido isadaidbo
 Esuquidistu tantiaquidobëd Nuquin
 Papa yacno ënëdenquoio yec
 tabadtequido nendac.

⁷Nuquin Papan, Cuidnu,
 quenquiocquin nadatiambocquin ëbi
 ismiaid yec ambi Esuquidistu
 chuiheneta caid ambi namiaid icsho
 ambi nadatiambocquin nabamiaidquoio
 nebi. ⁸Esuquidistu tantiabicquid utsi
 bëdiactsäc icsaquid icnubi comapenec
 icsaquidquoio icsho Nuquin Papan
 Esuquidistu tantiaquid icmeshun Esus
 bëdambo yaidbëdtabi abëd tabadte
 bëdaidquoio tantiamequiopondashi.
 Adembiidi ambi, Esuquidistu chuiheneta,
 caidquoio nebi. Adquid icquimbi
 Esuquidistun matses bëdamboen
 tabadmenu, quequin tantiaid dadpen
 icnuc aidtedi uesquin chuitiapimbo
 iquebi. Aidtedi matsesën bëdamboen
 tantiatiapimbo icoapec. ⁹Ëbëdtambi
 abitedi uampidquoio Esuquidistu aid
 tantiaquido ëbi yacno yuedquid
 iquendac, quequin Nuquin Papan
 tantiamenquiocboedi nëbi matses
 tantiamenuen Esuquidistu chuiheneta
 caidquoio nebi. ¹⁰Aden ëbipadquidon
 Esuquidistu chuiheniac icsaquid icboedi
 Esuquidistu tantiaquid dadpen yanac.
 Adsho isun aidtedi Nuquin Papan
 Esuquidistubëd abentsäc
 yacbimboecquid abipadquid ambi
 tantiampicpadomboen icmebanec. Aden
 icmebansho isun abi yacno tabadquin
 namequidon tantienquiocboedëmbi nëbi
 tantiendac. Nuquin Papan, Yuecshun

naden nanuna, quequin ambi
 bëdamboen tantiampicpadomboen
 nabanac nëbi abëd icquid dadpen iquec,
 quequin Nuquin Papan abi yacnoshon
 uaidon tantiec. ¹¹Matses bëdambo
 icmetequid Esuquidistu iquendac,
 quequin ambi tantiampicpadomboen
 Nuquin Papan Esuquidistu Nuquin Icho
 icmepanëdash. ¹²Aton mado
 Esuquidistu ëbi icsaid bedshunash
 unësash uincuenash Nuquin Papan
 dayunquoio iquec, quequin tantiec
 dacuëdenquoio yec Nuquin Papa chiec
 nuqui onquec. ¹³Adecbidi, Esuquidistu
 chuihenesho bedshun Pabado quënën
 nauedac, quequin tantiec
 chieshenquiocquin Esuquidistu tantiata,
 Epeso yacnocquido mibi caimbi. Ëmbi
 chuibanac Esuquidistu tantiaquid
 yansho Nuquin Papan abëdi
 tabadmenuequin Nuquin Papan ambi,
 Bëdamboquid icmenu, caid mibitedi
 neque. Chieshenda. Adembiidi Pabadon
 chiac ëbipadquid isadaidpembo
 utsi-utsiec dadpen Esuquidistu
 tantiaquid yampec, quequin tantiec
 tabadta.

Epeso yacnocquido tantiec Nuquin Papa chiec Pabado onquiaid

^{14,15}Nuquin Papan isadaidpembo
 Esuquidistu chuiheneta cac,
 chuihenesho quënën nauedaid icquin
 ëmbi chiac Esuquidistu tantiaquid
 isadaidbobëd isadaidpembo Nuquin
 Papan matses yanash aton shubun
 icquido nec. Nuquin Papan
 cuëmbanaido nec, quequin tantiec
 danëshën sebudash aid naden chiec
 onquebi. ¹⁶Mibi icsaisa icquin mimbi
 tantiacpaden Epeso yacnocquido nua
 pausun, Papa, ma natiamiantequid
 icnuc Esuquidistu tantiesa
 yanenquiocpanuna. ¹⁷Aden pausunac
 ma aido Esuquidistu

tantiadonequidombo icpanuna. Aido mimbi tantiamiac ënëdenquoio yec utsibëd tantiananec tabadquid ma Epeso yacnocquido icpanuna. ¹⁸Aden pausunac, Ëbi utsibobëdta comapenen tantiaquid Esuquidistu nec. Ambi bëyuc matses uaid tantiaquinc, aidën tsyuecquid ënden icpampido tantiaquinc, nëbi tsyuec tishaido tantiaquinc, tishabicquido tantiaquinc caquin aidtedi icsaid bedshunacsho Nuquin Papan cuidpanëdash, quequin ma Epeso yacnocquidon tantiapanuna, Papa. Adembidi abuc bëdamboshë yacno icboedëmbi matses icsaid bedshunacsho Nuquin Papan cuidpanëdash, quequin ma Epeso yacnocquidon tantiaquiopanuna, Papa. ¹⁹Aden tantiaquidquoio yec Esuquidistu unësnëdash, quequin tantiec papuduedash Esuquidistun matses tantiapadquidquoio Nuquin Papan ma mibitedi icmebampanuna.

²⁰Nadquid Nuquin Papan ëbi icmetsiash, quequin nuqui tantiatiapimboconobi nadatiambocquin nabanquin ambi tantiapadomboen abi yacpadquidquoio nuqui icmebanendac. ²¹Adoac ma abi tantiaquidon ënenquiocquin Nuquin Papan Esuquidistubëditan naid chuibampanuna. Ma aidon tsyuecquidontsen adembidi chuiopanuna. Ma nuquin tsyuecquidon tsyuecquidontsen adembidi chuiopanuna. Ambi uaid utsitedi naimëdec, quenubi ma adomboembidi Nuquin Papan Esuquidistubëditan naid matsesën chuibanoapanuna. Ai, ma ënenquiocquin adopanuna.

**Abentsëc yac bimboecquido
Esuquidistu tantiaquido**

4 ¹Nuquin Papan isadaidpembo Esuquidistu chuibeneta cac chuibenesho bedshun quënen nauedaid

icquin naden mibi chiembique. Tantia. Esuquidistu tantiaquido aton shubun icquido yec icbo bëdamboec tabadacpadquieci tabadteneta. ²Utsi icsambocsho isun, Icsaisa Nuquin Papapadquid yanabicquid nebi, quequin tantiaquin abëd onquequin abi icsaid ëmenuequin chuiban. ³Nuquin Papan Mayanën abi utsibëd bëdamboec tabadaid tantiamiacpadquieci Esuquidistu tantiaquid utsibobëd bëdamboec tabadteneta. ⁴Esuquidistu tantiaquidtedi abentsëc yac bimboecquid nec. Abentsëcquiobi mibitedi meniaid aton Mayan iquec. Adquiecbidi Nuquin Papa yacno nidash aidbëd tabadec abipadquid yec icsaisa iquendabi, quequin abuc indotequid mimbi caintequid abentsëcquiobi iquec. ⁵Abentsëcquiobi mibitedishun con Icbo caid iquec. Abentsëcquiobi mibitedishun tantiaidquoio Esuquidistu iquec. Esuquidistu tantiaquinc, Nuquin Papa tantiaquinc, aton Mayan tantiaquinc casho acten mentoaidtedi abentsëc yac bimboecquid nec. ⁶Abia yampid Nuquin Papa Esuquidistun Papambo abentsëcquiobi iquec. Abitedi uaquidquoio yec abitedi Chuiquid Dapambo nec. Aidbidi Esuquidistu tantiaquido bëdambo icmequid neoaic. Aidëmbi Esuquidistu tantiaquidobëd tabadnuequin abipadquid meniac nuquibëd aton Mayan iquendac.

⁷Esuquidistun ambi tantiapadomboen abi tantiaquid abentse-abentsen pausunec. Aden pausunac aid tantiec tabadendac.

⁸Ëndenquoio chiampicpadembi nëbi pausumbanec. Naden ënden chiampid neque. Tantia. Chuinu.

“Nuquin Papan abucquoio indoac, Ëbi tantiaquidtedi ëbëdi tabadendac, quequin Esuquidistun bedbanshun buanac bimboecquido aido nec.

Nadquidquio iquendac, quequin
 ambi tantiacpadomboen
 pausumbanac,”
 quequin ënden chiampid nec.
 9“Abucquio indoac,” quequin
 ðmitsipadomboen tantiampampiba?
 mibi quepec. Aidquio chuinu. Tantia.
 Esuquidistu abia yampid yec abucquio
 tabadboedi, Matses icsaid bedshunash
 ëbided cuidadnu, quianacsho
 nidaidëshun chidon tishpanëdash.
 10Aid nidaidëshun tishacsho unës
 uacsho uincuemequin Nuquin Papan
 aidquio abuc abi yacno indoshon
 abitedi chuiquidquio Esuquidistu
 icmepanëdash. Adquid icmiac ma ëbi
 tantiaquidobëd icpanueshun
 abipadquidquio aton Mayan aido
 menebanec. 11Aden aid menebanac
 aidënuquo Esuquidistu tantiaquido
 utsi-utsien nadquid icmepanec:
 Esuquidistu chuibenequid utsi-utsien
 icmepanquimbi, Nuquin Papan naden
 nanuna, quequin chiaid chuibanquid
 utsi-utsien icmepanoaic. Adquid
 icmepanquin utsi-utsien Esuquidistu
 chuibenequidon, Esuquidistu chuibanta,
 caidbidi aido icmepanquin utsi-utsien
 abëd iccuededquido isbanquin chuiquin
 tantiamequid icmepanoaic.
 12Bëdamboec tabadtenequido ëbi
 tantiaquidtedi icmeta, cac aidën
 tantiacpadomboen adquido icmepanac
 13ma shubu dapan icquid dadpen yanec
 abentsëc yacbibmoec abi
 tantiadonequido icpanuna. Aden
 Nuquin Papan mado tantiadonec ambi
 uesquin pausunaidquio yec
 abipadquidquio iquec icsaisa iquendac.
 14Ambi pausunaidquio icquin abimbo
 chiacbibmoen utsibon chuisho
 tantiabenabicquidën badedquio
 tantiacpaden tantienquio nuqui
 iquendac. 15Tantiananec abimbo
 chuinanquido Esuquidistu

tantiadonequido icmiac chuiquid
 Esuquidistupadquid yanash abëdi
 abentsëc yacbibmoecquid nuqui
 yanendac. 16Ëbi chuiquidquio
 Esuquidistu nec, quequin ambi
 chiacpadomboen nabanquidquio abi
 tantiaquidtedi yec abëdi abentsëc
 yacbibmoecquid nuqui iquec.
 Esuquidistun pausunacpadomboen
 abentsëcshun-abentsëcshunquien
 nabanequid tantiananquieq abi
 tantiaquidtedi Esuquidistupadquidquio
 abëdi abentsëc yacbibmoecquid
 yanendac.

Esuquidistun nua pausunacpadquieq tabadteniaid

17Esuquidistubëd abentsëc
 yacbibmoecquid abi tantiaquidtedi
 iquendac, quiaish, aidpadquid icnu, quec
 ënden icsamboec tabadnëdacpadquieq
 tabadenda caimbi mibi. Esuquidistun
 ëbi chuibeneta caidquio icquin dada
 uaqin mibitedi aden chiembi.
 Esuquidistu tantiesan ambibi
 tantiacpadomboenuidi tantieq. Adecbidi
 ambibi tantiacpadomboen nabanec.
 18Pashuacbibmoen tantienquio iquec.
 Nuquin Papabëd tabadte iquec, utsibo
 quesheo tantiesha yec, Tantiatiapibi,
 quepec aido. 19Icsaquid nebi, quequin
 badedquio chienquio aidon iquec.
 Adquid icsamianquidën yuaid yec,
 Icsanu, quiacpadec tabadec. Adeq
 icsasho utsin istemaaid nec. 20Adpenquio
 Esuquidistun tantiamequin pausunaid
 iquec. 21Esuquidistu chuibancho Epeso
 yacnocquidon tantiaposh, quequin
 chuisho tantiapondambi. Mibi, Aid
 tantiaquid nebi, quesheo tantiashun
 Esuquidistu chuibenequidon, Abëd
 icquid yec abipadquid yanebi quec
 adquiecbidi tabadteneta, quequin mibi
 chuipondash. 22Adoac mimbi
 tantianëdacpadec tabadoainda. Mibi

ënden icsamboec tabadacpadquiequi mibi icsaded-icsadedondac. Icsaquid yequi, Bëdambocquid nebi, quec mibi muadenepondac. ²³Mibi icsate bunaid ënta. ²⁴Adsho isun ma Esuquidistun tantiacpadomboen tantiapanu quesahun Nuquin Papan Mayanën mibi nua pausunendac. Adoac adomboembidi mimbi tantiapec. Adecbidi aid bunacpadquiec bunoapec. Adoaid yec mibi bëdambocquid icnuec icsaisa yanec mibi bëdamboec tabadtenendac. ²⁵Adquid icnuec Esuquidistun shubun icquido nebi, quec muainquo yec Esuquidistu tantiaquid utsibobëd abimbo chuinanquidombo icta. ²⁶Nëishhec icsaında. Nëishash abi ushëmbi bëdanta. ²⁷Satanasën yuanushe quiash badedquo bëdanta. ²⁸Ampequid icboedi Esuquidistu tantiaquid yanshun ampenda. Adquid icboedi chonoadquin mitsana bedshun utsin na nibëdsho isun menequid icta.

²⁹Icsaquid onquiacbimboec onquenda. Utsi tantiaquin bëdambocquid icmenuequin chiec onqueta ma Nuquin Papan aidtsen bëdambo icmepanu quiash. ³⁰Esuquidistu tantiaquid mibi icsho isun Nuquin Papan, Con bacuëbo yec ëbëdi tabadendac, quequin ambi tantiametequid aton Mayan mibi meniac. Aidi mibi icsaisa icmenuequidën mibi icsasho isec unësquo yampec. Aid unësquo icmenda. ³¹Utsi icsamboen chuinu, quequin tantiaid ënta. Adecbidi comapenec nëishash bëdanta. Utsi cuestiadquo yec nëishboedi adecbidi bëdanta. Nëishash chushqueboedi adecbidi bëdanta. Utsi icsamboen tantiaquin chuiboedi adecbidi bëdanta. Utsi icsamboen tantiaid adembidi ënoata. ³²Adembidi bëdambo icmenuequin utsi bëdamboen tantiaquin nabanta. Adecbidi utsin chieshënquin

mibi icsamboen nasho isash chieshnanec cuidnanenda. Esuquidistu mibi icsaid bedshunash abided cuidadec unëso isash Nuquin Papa mibi icsaid bëpiscudacpadquiec utsi icsaid bëpiscudoata.

5 ¹Nuquin Papan bacuëbo yec ²tantiananec tabadteneta. Nuquin Papan chiampicpadquiec Esuquidistu nuqui tantiaquin nuqui icsaid bedshunash abided cuidadec unëspanëdash. Adquidquo icsho isun Nuquin Papan bëdamboen isaidquo Esuquidistu icpanëdash.

³Esuquidistu tantiaquid yec, Mimbi inacmaid isec chudnu, quesambo icta, dada. Adecbidi, Èbi inesa chudmenu, quesambo icta, chido. Opabimboec iquenda. Adecbidi, utsin na isash, Bednu, quesambo icoata. Esuquidistu tantiaquid nebi, quequin adoenda. ⁴Adecbidi, Esuquidistu tantiaquid yec tsienbëdta shui icsamboen chiec onqueboedi adec mibi onquiaid ënta. Adecbidi, utsi icsamboen oncaisambo icta. Adecbidi, bëdamboec onquequid utsi uain chuiquin mamënshunesambo icta. ⁵Chudtemaid chudnu, quequinuidi chudquid yec opabimboecuidi tabadquid Nuquin Papa yacno Esuquidistun shubun icquid ictiapimbo iquec. Adecbidi, Bednu, quequinuidi bedquid yec Nuquin Papa yacno Esuquidistun shubun icquid ictiapimbo iquec. Aden nabanquid Nuquin Papabëd Esuquidistu con icbo nec, quetiapimbo icoaic. ⁶Ambembi chiec onquiaid tantiesa icta. Adquid Nuquin Papan chiacpadomboen naisa nec. Adquid Nuquin Papan comapenen cuidendac. ⁷Adquidbëd icsaında.

⁸Ënden Esuquidistu tantiesa icquin inchëshquiocnoc isacbimboen tantienquo icboedi nëbi Esuquidistu tantiaquid mibitedi yansho ambi

tantiamebaniaido icquin badiadnuc
isucunacimboen tantiaquiota. Aden
tantic Nuquin Papan bacuëbo yec
Nuquin Papan tantiamiacpadquiec
bëdamboec tabadteneta. ⁹Esuquidistun
ambi tantiacpadomboen pausunac abi
yacpadquiec nuqui bëdamboec
tabadtenendac. Adembidi aid
yacpadomboen abimbo chuidenequid
icta. ¹⁰¿Nadec tabadshodabi Nuquin
Papan bëdamboen istiashe? Tanu,
quequin adomboen nabanec
tabadteneta. ¹¹Utsibëd icsaïnda. Utsi
icsadenenubi mibi bëdamboec
tabadtenesho isun abi icsaïd utsin
ëmpec. ¹²Icsaquidën ompoquin naid
chuitemaid nec. ¹³Adquidën Esuquidistu
tantiaquid bëdamboec tabadtenesho
isun, Icsambocquid nebi, qeshun
Esuquidistu tantiabempec. ¹⁴Bëdamboec
tabadquin ismedeniac
icsambocboedëmbi bëdamboen
tantiabentsiash. Esuquidistu tantiaquido
chuiquin dada uaid nad iqueque. Tania.
Chuinu.

“Unësacimboen tantienquioeboedi
isucunshun tantiabenacimboec
bëdamboec tabadta.

Adquid icsho Esuquidistun mibi nua
pausunendac.”

¹⁵Adec bëdamboec tabadnuc
Esuquidistun tantiamiacmaid
tabadacpadec tabadenquio yec
Esuquidistun tantiamiacpadquiec
tabadteneta. ¹⁶Icsaquid dadpen iqueque.
Aidpadquid iquenda. Esuquidistun
pausunaid mibedi bëdamboec
tabadtenesho isec ma Esuquidistu
tantiesia icboedi abi tantiaquid
yampanuna. ¹⁷Mimbi icsamboen
tantiacpaden nabanenda. ¿Atotsi mimbi
ëbi namepatsia? quequin Nuquin Papa
chui. Aden abi chuïsho Nuquin Papan
mibi tantiamiacpaden adobanta.

¹⁸Icsachitomane quequin nua

paëmbocquid aquenda. Aden aquec
icsaïndac. Icsate bunenquiocquin
Nuquin Papan Mayanën
tantiamiacpadomboen nua pausunaid
icquin bëdamboen nabanta.

¹⁹Adec icsate bunenquiocquin
Esuquidistu tantiaquid utsibobëdtan
Nuquin Papan chiaïd chuiquinc,
chuiquid dapa Dabidën dada uampid
sadmo caïd utsi-utsien chuiquinc,
cuëdënte utsi chuiquinc cain chiec
cuëdënteneta. Adec cuëdënquin Nuquin
Icbon naid chuideneta. ²⁰Esuquidistu
tantiaquid icsho Edoenën Nuquin Papan
bëdambo icmiaïdtedi yec aidën naid
chiec onquedeneta.

Utsi tantiaquin nashunta quiaïd

²¹Esuquidistu con icbo nec, quequin
ambi chiaïd niacmane qeshun utsi
tantiaquin nashunta.

²²Adembidi Esuquidistun
chiacpadomboen dadan inaidën min
bënën chiacpadomboen nabanta.

²³Adembidi abi tantiaquidtedi
chuiquidquio Esuquidistu nec. Abi
yacno indoshon ënëdenquio yec
icsainquiocnoc tabadmendac. Adembidi
aton chido chuiquidbidi aton bënë nec.

²⁴Esuquidistun chiacpadomboen abi
tantiaquidon nabanacpadomboen aton
bënën chiaïd naquidquio aton chido
neoaic.

²⁵Esuquidistu abuc tabadboedi abi
abuc bëdamboec tabadtequid
tantienquio yec unës uanushe quenquio
yec matses tantic nidaidënshun tishaid
yec matses icsaïd bedshunash abided
cuidadec unësapanëdash. Abuc ëbëdi
abentsëc yacimboecnuc tabadmenu,
quec unësapanëdash. ²⁶Adecbidi, Ëbi
tantiaquido icsaisa icmenu, quias
abided cuidadec unësapanëdash.

²⁷Adecbidi, icsaïd nibëdquid bëdaïdquio
abi tantiaquido icmeshun Nuquin Papa

yacno yuedshun, Ĕmbi yuedboed min shubun ictequid nendac, quequin ismembi, quec Esus unĕspanĕdash.
²⁸Adomboembidi chido inquidĕn abibi tantiadacpadomboen ma con chido tantiaquin, Bĕdambocquid icmenu, quequin nashundeniash ma aidbĕdi bĕdambocquid icsho Nuquin Papa yacno Esuquidistun yuedpanuna. Aton chido tantaquid abibi tantiadquidbidi nec. Aidbĕdi abentsĕc yac bimboecquid neoaic. ²⁹Abibi chieshĕmĕdesa dada nec. Bunquioquin peshun aquec. Adembidi iquenquin cuĕte cuĕec. Esuquidistun abi tantaquido abĕd icquido icsho aido tantiaquin nabanac bimboen ³⁰dadān abĕd icquid aton chido icsho aidi tantiaquin nashunquid. Dadaba uashun aidĕn shictodobi chieshun chido uapampic. Adoshon dadan nami aton canitebĕdta chido uashun daĕd uac abentsĕc yac bimboec aid daĕdi yanac.
³¹Nuquin Papan ĕnden dada uampid nad iqueque. Tantia. Chuinu. “Aidbĕd icnu, qeshun bedash aton papa aton titabĕdta nianac bimboec daĕdash aton chidobĕdi abentsĕc yac bimboec tabadtenec.” ³²Adec dada aton chidobĕd daĕdash abentsĕc yac bimboecnuc ambi icmiampicpadec Esuquidistu tantaquido aton shubun icquido abentsĕc yac bimboec tabadendac, quequin chiec.
³³Nĕbi adomboembidi chido inquid ambi inaidbĕdta chuioaimbique. Tantiata. Mibibi tantiadacpadomboen min chido bĕdamboen tantiata dadan. Con bĕnĕ ĕbi chuiquid nec, quequin aidĕn chiaid tantiata chidon.

**Bacuĕbobĕdta bacuĕchoquid
tantiamequin chuibanaid**

6 ¹Bacuĕbon Esuquidistu tantaquid icquin papan chiacpadomboen chieshenquiocquin nabanta. Titan chiacpadomboembidi

chieshenquiocquin nabanoata. Aidon, Nata, quequin chiaid cacuidenquiocquin nata. ²Nuquin Papan, Naden nata, quequin ambi chiaid cuĕnoten dada uaid Moises meniampid abentsĕc nad iqueque. Tantia. Chuinu: “Ĕbi chuiquid nec, quequin tantiaquin papan chiacpadomboen nabanta. Adembidi tantiaquin titan chiacpadomboembidi nabanoata,” quequin Nuquin Papan chiampid nec. Aden naquid cuidte nad iquec, quepampic: ³“Amĕn anibĕdtan chiacpadomboen naquid Nuquin Papan bĕdambo iquebi camiaidquio iquendac. Adecbidi nidaidĕn yuec tabadnuequin adobanta,” quepampic.

⁴Amĕn anibĕdtan con bacuĕbo chieshmemane qeshun bĕdamboen chuiquin tantiamequin isme. Adembidi, aido pemeshun acme. Adembidi, Ĕmbi chiacpadomboen ma nabampanueshun Nuquin Icbon chiaid tantiamenu, quequin adobanta.

**Utsin yuaido yuaquidobidi
tantiamequin chuibanaid**

⁵Yuan mimbi Esuquidistun chiacpadomboen nabanacpadomboembidi mibi yuaquidĕn chiacpadomboen nabanta. Abuc nidabicquin, Con icbo iquec, quequin chieshenquiocquin mibi yuaquidĕn chiacpadomboen nabanta.

⁶Min icbon chuishun isnuc ambi chiacpadomboen bĕdamboen mimbi nabanacpadomboembidi min icbon isenquiocnoc nabanoata. Esuquidistu con Icho nec, quequin aidĕn chiacpadomboen nanuna, quequin nidaidĕnshun min icbon chiacpadomboen nabanta. Aden nabanquin Nuquin Papa bunacpadomboen mimbi nabanendac.
⁷Min Icho Esuquidistun aton Papan chiacpadomboen chieshenquiocquin

nacpadomboen nidaidënsun min icbon chiacpadomboen chieshenquiocquin nabanta. ⁸Bëdamboen nabanquido yuacmaïdbëdta yuabo Nuquin Papan bëdamboen cuidquin menendac, quequin tantiaquin bëdamboen nabanta.

⁹Yuaquidon min yuabo chieshënenquiocquin bëdamboen chuibanta. Mibi cuesnu, quenquiocquin ancata. Min Ico abucquio tabadquid min yuabon Icbobidi nec. Aidën abitedi isec: Nëidic yua icsho daëdpactsëc pausunembi. Utsibic, abi yuaquid icsho nua pausunembi, qesa Nuquin Papa nec. Yuaquid isacpadomboen yua isec.

Satanas cuemetequid dasiuidaid

¹⁰Nuquin Ico nadatiambocquin nabanquid iquec, quiash aidënquio nua pausunaid icta. ¹¹Satanas cacumetequid dasiuiu, quiash, Nuquin Papa mibi nua pausunuesho, Ai, cata Satanasën mua uaquin bedchitoshe qeshun. ¹²Matses isadacpadpenquo nami intacbëd isadesa Satanasbëd icquido nec. Aitedi Nuquin Papan abi tabadaid tëdion tabadmec. Aido icsamianquido nec. Matses yuanuequid Satanas nec. Nuquin Papan uaid tantiasbëdambo mibi iquendac, quequin muaquin aidon chiec. ¹³Aden muaquin chuiquid aitedi iquec, quequin tantiec Nuquin Papan cacumetequidtedi dasiuidash tabadteneta. Adquid dasiuidquid icquin ambi comapenec natiatequid ushë chonoc Satanas mibi icsamenuec choacsho bëcuniacbimboen cacumec abi mibi nidtoash Esuquidistu tantiaquid yec nidendac. ¹⁴Aid cacumec abi nidquid icnuec Nuquin Papan abimbo chiaidquid nacrëshëdabimboec tabadteneta. Adembidi, Nuquin Papan abi bëdamboec tabadtequid shictoncacbimboec tabadteneoata. Adec

tabadec abi nidtoash mibi nidendac.

¹⁵Adecbidi, Esuquidistu tantiaquid ëbëd icquid iquendac, quequin Nuquin Papan tantiamequin pausunaidën tapucudacbimboen adomboembidi chuibenequin Satanacacumec nidacbimboec abi mibi nidendac.

¹⁶Esuquidistu tantiaquid Nuquin Papan dayun uaic, quequin Nuquin Papan tantiamequin pausunaidënquio dëcatemënquiash abi mibi nidendac.

Aden Nuquin Papan tantiamequin pausunaidënquio dëcatemënquiash Satanasën abi tantiamenuequin pian sedo-sedoacbimboen pausuntemaid yec abi mibi nidendac. ¹⁷Adecbidi, Esuquidistu tantiaquid ëmbi yuedtequid nendac, quequin Nuquin Papan tantiamiac utsin machictiapimbo yec shocosh mauete uaid mauiacbimboec tantiec tabadteneta. Aden pausunac tabadquin Satanac, Esuquidistu mibi bedec choenquio iquendac, qesho cacumiash abi nidquin mimbi ënenquiocquin, Esuquidistu choate cainembi, quequin abi mimbi caimbudendac. Adecbidi, shocosh siantebimboecquid Nuquin Papan chiaid nec. Ambi chiaid aton Mayanën tantiamiaidquid icquin mimbi chuisho tantiasbëd Satanacacumec nendac. ¹⁸Adecbidi, Nuquin Papan chiaid aton Mayanën tantiamiaid icquin utsibo tantiaquin badeb-badebquiec Nuquin Papa chiec onqueta. Satanasën icsamenushe quiash Esuquidistu tantiaquid utsibo Nuquin Papa chiec onquedeneta.

¹⁹Ëbitsen tantiaquin Nuquin Papa chuioata. Dacuëdenquiocquin Nuquin Papan tantiamiacpadomboen Esuquidistu abi yacno yuedanquidquid nec, quequin Pabado chuime, Papa, quequin ëbitsen chuioa. ²⁰Esuquidistu chuibeneta caid icquin abi chuibenesho mëtaneshun quënën nauedaid nebi.

Adoaid ëbi icnuc mimbi tantiacpaden
chui banquid Pabado icme, Papa,
quequin chui oata.

Ënquin chiaid

²¹Nëbi ëbëd icquid chiembique.
Tantia. Tiquico mibi yacno nidec.
Aidbidi Esuquidistu tantiaquid icsho
nuqui con utsi caid nec. Nuquin Icbon
chui miaidquio aidi nec. ²²Mibi yacno
puduedshun ëmbi naidtedi ëbi
tabadaidbëdta mibi chui banendac. Ëbi

mimbi chuisho tantiash, Bëdambo
iquebi, quependac Epeso yacnocquido,
quequin Tiquico mibi yacno nidmembi.

²³Mibëd icquido Esuquidistu
tantiaquid utsibobëd ma bëdamboec
tabadpanuna caimbi mibitedi.
Esuquidistun Nuquin Papabëdta abi
tantiamiantequidbëdta utsi tantiatequid
pausunaid ma icpanuna caimbi
mibitedi. ²⁴Ënenquiocquin Nuquin Icbo
tantiaquidtedi ma abipadquid
icpanuna.